



Sandro Botticelli, lis provis di Mosè, det. (Simonetta Vespucci)

tu sigûr che no tu sâs

*che jo in forans - e no pai trois
de val plui svelts - o cîr lis rosis*

*(Vittoria Aganoor Pompilj,
1855-1910)*

intal sest de ere fassiste, Taresie e à sedis agns. cul
passe-peraule che al place garzonis, e va a servî a Rome, intune famee
ebraiche: regulis riggidis, rapuarts distacâts. ma par jê a son une sigurece
mai vude prin. e sa il so ce fâ e lu fâs cun precision. in chel ricet gnûf si
sint libare, cence lancûr o maluserie. cence esitancis o perplessitâts, intun
cuiet mai provât prin.

intai moments libars e sbrisse lizere framieç la int di
place Navone, ben contente di confondi i siei pas cun chei di altris, mai
cognossûts: incrosant cence fastidi voi mai cjalâts. cence movi curiositâts o
jevâ sot vie alusions. pe prime volte il cûr i bat in calme. e à lassât par
daûr intun sgrisul, i dîs ruspis di un vivi altri. ogni tant e discosole la
brame che la pês di chei culî no vedi mai fin. une preiere sordine, che la sô
vôs no cognòs peraulis dretis.

ancje se sul libri di Sirac

al 35, 17-18, si lei che « *la*

*preiere dal umil e passe i nui. fin che no rive no si contente: no mole
fintremai che l'Altissim nol sedi intervignût, rindint sodisfazion ai juscj*

» il cîl parsore Rome al è masse adalt o dut impegnât li ator.

intal mê di Jugn dal '38, a son vot agns che e je li, i

parons a decidin di bot di partî pal forest. ducj spaurîts. « ... ma cuant che o tornin o volin vêti in mò cun nô ... »

jê e va di corse a la *fontane dal moro*: la sô

preferide (e veve scuvierit someance di chês musis, cun trats di famee: ur fevelave dentri vie). vuê i somee che a vain ancje lôr.

no rive a colegâ lis leçs raziâls [\[\[1\]\]](#)

cun chel so tornâ sfuarçat a cjase. dome cuant che auris l'aghe de fontane mingulute dal pais, i ven un grop, pensant a chês gaiosis lassadis là jù: lis solis amiis che veve confidât i segrets dal cûr.

ma ve subit une

ocasion pe France.

ti laressie ben, Nerute

?

a jê i va ben ogni puest, tant in cualsisei lûc al è simpri

lunis. i baste dome che nissun la cjali par giudicâle o i stei daûr par

conseâle. par fortune a chei di fûr che vuelin savê alc di jê, ur baste il

scrit dal plevan. e a jê i baste un puest cjalt e un vistît net. lontane dal

frêt e de puce di stale de sô infanzie. e impare subite il bonodôr dai profums

francês. un incjant: no fasarà mai plui cence di lôr.

e lavore cun puntualitât e simpri in submission: cence

nostalgjie. che lis viertis culî no son diviersis di chês cognossudis di piçule.

tant che i scussions, che apartegnin ai cîi aviertans di cuasi dute Europe.

a Mai, cuant che lis fueis a son bielis mulisitis, la tiere

ju parturîs, mangjons e safarons. la sere a svolin cidins di ramaç in ramaç. a

si tachin sui lampions. a jentrin in cjase. ma no fasin mâl, infûr de lôr fan

di fueis. i fruts a zuin parie: ur lein un fîl di cusî a la çatute daûr, e ju

fasin svolâ ator: che a somein parons dal cîl.

salf colâ a la svelte. il fil al è masse curt: une ilusion

di libertât cence contâ chel che si opon. o chel che al impedîs a un insium di

inverâsi in sperance.

scusson, in pronunzie, al svicine il francês *cochon*.

ma la assonance e mûr li: che il purcit nol à lis alis, cussì i son sierâts i trois dal cîl. in compens si rondole intal pantan biel comut, cence bacilâ se al smierde ator.

ogni tant Taresie e sclope fûr intun *cochon* cun savôr di invetive. e somee une stravagance, impen al è un sbrocâsi. che nissun al capis. ma cui àjal mai capît alc di jê: vint par man dome judizis imburîts. a san che e je tornade a cjase inmò fûr stagjon. no savint parcè a sfuarcin strolegaments:

« *par lâ tes fameis al vûl bocje di purcit e schene di mus...* »

« *ehh ! al nas ce che si semene, ma ogni semence no nas...* »

« *... e jê e a fat di mancûl di semenâ par pôre des passaris !* »

grivie la vite di paîs ! ducj a san dut di te e cuant che no lu san, lu fasin dongje daûr di un lambic prevignût.

« *po sêstu inmò a cjase, Nerute?* » - « *o partîs doman* »

« *par dulà, tu*

?» - « *pe Svuizare* »

« *miôr che in americhe, no mo ?* » - « *di sigûr ! al mancûl o speri ...* » “... e simpri miôr di culî”.

ooo

di prionte

sant'Antoni des

papucis [2] / fâs c'ò cjati ce c'ò ai pierdût ...

fâmi cjatâ chê frute bionde / intivade in tren, seconde.

jê e vignive dal Friûl / e steve lant a Winterthur.

strache e jere e no cjatave / nancje un puest di poiâ il

cjâf.

jo i ai dit se mai voleve / durmî un pôc sui miei zenoi.

po o ai cirût di tignî il flât / par sintile respirâ.

cuant che o ai vût di dismontâ / cun ce voi che mi à cjalât

!

cuntune man intai cjavei / dispetenâts dal aiarin.

jo no sai ce che si clame / e dulà che larà a stâ.

ma se o voi a Winterthur / la domenie di buinore,

jo la spieti sul sagrât / dopo messe des siervutis.

sant'Antoni cu lis scarpis / tu sês sbrissât

restant impins ...

fâmi cjatâ chê frute bionde / che la incuintri inmò: chê

dolce,

tant che il cidivoc de vierte [3]

/ che i frutins in primevere,

a supin sù in

dret de tiere / cence nancje rompint un ...

dal Passadôr

[1] il Reâl Decret di Leç dal cinc setembar

dal 1938, al fissave i “*proviodiments pe difese de raze inte scuele fassiste*”

e chel dal siet di setembar seguitîf i “*proviodiments intai confronts dai ebreus forescj*”. parie cun la “*deklarazion su la raze*” dal Grant Consei

dal Fassisim a daran dongje il *corpus* des leçs raziâls. i nons plui cognossûts

che an aderît: *Piero Bargellini, Amintore Fanfani, Luigi Gedda, padre*

Agostino Gemelli, Giovanni Papini.

[2]

sant'Antoni dai padü fam trovè chël c'ö

perdu: poesie in dialet de Val Leventine, di Zuan Orelli, ticinês dal 1928 - muart il dodis di novembar dal 2013.

[3]

cidivoc

de vierte: *crocus*

sativus o zafaràn (dal arap "za'farân" che al vûl dî zâl) de famee des Iridaciis. di no confondilu mai cul **cidivoc des vendemis:** *colchium autumnale*, che e je une plante velenose, de famee des Liliaciis.